

इवनिंग डोगरी न्यूज बुलेटिन

समे .18:15 Hrs

<><><><><><>

Headlines

- 1 मुखमंत्री उमर अब्दुल्ला होंरें आखेआ ऐ जे काबीना दी उप कमेटी नै आरक्षण बारै अपनी रिपोर्ट, रिकार्ड समें दे अंदर-अंदर जमा करोआई दिती ऐ ते सरकार इस प्रक्रिया गी अगड़ा बधा करदी ऐ।
- 2 मुखमंत्री होंरें आम लोकें तगर पुज्ज आहली प्रणाली गी तगड़ा बनाने दे मकसद कन्नै जम्मू च अपने राबिता दफ्तर दा उद्घाटन कीता।
- 3 केंद्री मंत्री गजेंद्र सिंह शेखावत होंरें आखेआ ऐ जे केंद्र ते जम्मू-कश्मीर दौनें सरकारां किट्ठे रलियै सैलसफा खेतर च नमें सिरेआ जान भरने लेई जत्न करै करदिआं न।
4. कल मनाए जाने आहले अंतरराष्ट्री योग दिवस लेई जम्मू संभाग च सब्बै तैयारियां मुकम्मल।
5. उपमुखमंत्री सुरिंद्र चौधरी होंरें आखेआ ऐ जे सरकार, औंदी श्री अमरनाथ जी दी जातरा दरान सुरक्षा ते होर दुए लोड़चदे प्रबंध जकीनी बनाने लेई अनथक जत्न करै करदी ऐ।

<><><><><><>

CM Reservation (Byte)

मुखमंत्री ओमर अब्दुल्ला होंरें भर्थी प्रक्रिया च आरक्षण दे मामले पर होई दी खरी मती प्रगति उप्पर लोस पांदे होई आखेआ ऐ जे कैबिनेट सब-कमेटी नै तय समें-सीमा च 6एं म्हीनें दे अंदर गै अपनी रिपोर्ट जमा करोआई दिती ऐ। जम्मू च इक संवाददाता सम्मेलन गी संबोधित करदे होई मुखमंत्री होंरें आखेआ जे काबीना नै सब-कमेटी दिएं सफारशें गी मंजूर करी लैता ऐ ते इस रिपोर्ट गी अगड़ी जांच ते टिप्पणिएं लेई कानून मैहकमे कश भेजी दिता गेआ ऐ। ओमर होंरें जोर देइयै आखेआ जे बेल्ले सिर कार्रवाईयां, समग्र विकास ते शासन दे प्रति सरकार दी वचनबद्धता गी दर्शादिआं न। इस मौके बोलदे होई मुखमंत्री होंरें आखेआ

तोआई प्रस्तावित पनबिजली परियोजनाएं दी स्थिति बारै पुच्छे गेदे इक सोआलै पर प्रतिक्रिया दिंदे होई मुखमंत्री ओमर अब्दुल्ला होंरें आखेआ

<><><><><><>

भलेआं हेठली सतह तोहड़ी आम लोकें कन्नै संपर्क बनाने दी दिशा च इक बड्डी गैह पुट्टदे होई मुक्खमंत्री ओमर अब्दुल्ला होरें अज्ज जम्मू च अपने राबिता दफतर दा उद्घाटन कीता। लोकें तोहड़ी पुज्ज बनाने आहले सरिस्ते ते सरकार ते बसनीकें बश्कार संपर्क गी तगड़ा बनाने दे मकसद कन्नै शुरु कीता गेदा एह दफतर, हर हफते संगारें शा लेइयै शुक्करवार तोहड़ी बड्डलै 10 बजे शा दिनै 4 बजे तगर कम्म करा करोग। आम लोक, राबिता दफतर कन्नै संपर्क करने लेई ई-मेल आईडी raabita@jk.gov.in पर राबता करी सकदे न। आम लोकें, सरकार दी इस गैह दा सोआगत करदे होई इसी बसाह-भरोसा ब्हाल करने लोकें दी शमूलियत आहली शासन बवस्था जकीनी बनाने दी दिशा च महत्वपूर्ण गैह करार दिता ऐ।

<><><><><><>

Shekhawat Tourism (byte)

केन्द्री मंत्री गजेन्द्र सिंह शेखावत होरें अज्ज आखेआ ऐ जे केन्द्र ते जम्मू-कश्मीर दी सरकार, प्रदेश च सैलसफा खेतर च नमें सिरेया जान भरने लेई नेइमा तालमेल बनाइयै कम्म करै करदी ऐ। राजस्थान दे जोधपुर च मीडिया कर्मिं गी संबोधित करदे होई मंत्री होरें आखेआ जे पहलगाम च हाल च होए दे आतंकवादी हमले करी, खिते च सैलसफा गी बड़ी मती पच्छाइ लग्गी ऐ। उ'आं उ'नें इब्बी आखेआ जे केन्द्र ते जम्मू-कश्मीर, दौनें दी सरकार आसेआ सांझे तौर उप्पर कीते गेदे जतनें करी हून बल्लें-बल्लें सैलसफा गतिविधिं च फही तेजी दिक्खने गी लब्भा करदी ऐ। जम्मू-कश्मीर दे अपने हालिया दौरे बारे बोलदे होई मंत्री होरें ओकड़ी थाहें बारे बी अपने बचार सांझे कीते जि'दे च सैलसफा दी बड़ी मती समर्थ मजूद ऐ। उ'नें आखेआ

<><><><><><>

Green Jammu

जम्मू च सैलतन आहली थाहें दे बाददे-विस्तार लेई इक महत्वपूर्ण पैहलकदमी दे तैहत जम्मू नगर निगम आसेआ क्लीन जम्मू-ग्रीन जम्मू अभियान दे तैहत अखनूर रोड पर सीआईडी दफतरें दे नेड़े रूक्ख-बूहटे लाने सरबन्धी इक मुहिम चलाई गेई। युवा सेवाएं ते खेड्डें सरबन्धी मैहकमें दिएं ज्वाईट डरैक्टर वीनाक्षी कोल होर कार्यक्रम दि'आं मुक्ख परौहिनया हि'आं। इस अभियान दा मकसद पर्यावरण संरक्षण गी बढ़ावा दा ते बसनीकें गी सैलसफा आहली थाहें दे बाददे-विस्तार दी दिशा च अपनी भूमिका निभाने लेई जागरूक बनाना बी ऐ। इस पैहलकदमी दे तैहत जम्मू शैहा च औंदी 15 अगस्त तगर 60 जहार शा मती रूक्ख-बूहटे लाने दा लक्ष्य मित्थेआ गेदा ऐ।

<><><><><><>

Ramban Dharti Aabha (byte)

जनजातीय समुदायें गी सशक्त बनाने दी पैहलकदमी तैहत रामबन दे जिला प्रशासन आसेआ धरती आभा जनभागीदारी अभियान दे तैहत जागरूकता कार्यक्रमें दा आयोजन कीता जा'रदा ऐ। इस किस्में दे कार्यक्रमें दरान बक्ख-बक्ख सरकारी मैहकमें आसेआ अपनी पैहलकदमिं ते योजनाएं बारे लोकें गी जानकार बनाया जा'रदा ऐ। एह कार्यक्रम जनजातीय समुदायें दे लाभार्थिं ते सरकारी अधिकारिं बश्कार सिद्दी गल्लबात दा इक महत्वपूर्ण मंच बी साबत होआ करदे न। इंदे राहें जनजातीय समुदायें दे लोक, बक्ख-बक्ख योजनाएं दे लाह हासल करने मतल्लक अपने शक-शूबे दूर करै करदे न। इस सरबंधै च आकाशवाणी समाचार कन्नै गल्ल करदे होई रामबन दे मुख योजना अधिकारी शकीब अहमद राथर होरें आखेआ

<><><><><><>

Yoga-Preparations

समूलचे जम्मू खिते च कल मनाए जाने आहले 11में अंतरराष्ट्री योग ध्याड़े लेई सब्बै तैयारियां पूरी करी लैती गेदियां न। हर उमी दे लोकें दी हिस्सेदारी गी प्रोत्साहित करने आस्तै पूरे खिते च सामूहिक योग सत्र ते जागरूकता कार्जक्रम निर्धारित कीते गेन। अधिकारियें सुचारू इंतजाम ते बद्दोबद्द भागीदारी सुनिश्चित करने आस्तै स्थानीय संगठनें दे कन्नै सहयोग कीता ऐ। इस ब'रे दा विशेषार 'समग्र स्वास्थ्य ते मानसिक भलाई' पर केंद्रित ऐ। अधिकारियें सब्बनें गी कार्जक्रमें च हिस्सा लैने ते सेहतमंद जीवनशैली आस्तै योग दे फायदें दा अनुभव करने आस्तै प्रोत्साहित कीता ऐ। इसै सिलसिले च अज्ज रियासी च राष्ट्री आपदा मोचन बल आसेआ आयोजित इक कार्जक्रम च 2 बरें दे प्रशिक्षित अवारा कुतें दर्शकें गी मंत्रमुग्ध करी दिता। सत्र दी अगुवाई करने आहले इंसपेक्टर मुंशीराम होरें आकाशवाणी समाचार कन्नै गल्ल करदे होई आखेआ।

<><><><><><>

Dy CM Amarnath

सालाना श्री अमरनाथ जी दी यात्रा आस्तै तैयारियां जोरें-शोरें कन्नै जारी न। उपमुखमंत्री सुरिंद्र चौधरी होरें यात्रा पर औने आहले तीर्थ यात्रियें गी शुभकामनां दितियां न। उनें आखेआ जे मुखमंत्री उमर अब्दुल्ला होरें सुचारू ते सुरक्षित यात्रा दी गारंटी देने आस्तै निजी तौरा पर सब्बै इंतजामें दा जायजा लैता ऐ। प्रशासन रस्ते च लोड़चदी सुरक्षा, मेडिकल मदाद ते साज-समेयान दी मदाद यकीनी बनाने आस्तै लगातार कम्म करा'रदा ऐ। उनें भरोसा दोआया जे सरकार सद्भाव बनाई रखने ते यात्रा गी असरदार तरीके कन्नै सुविधाजनक बनाने आस्तै बचने बज्झी दी ऐ। पत्रकारें कन्नै गल्लबात करदे होई उपमुखमंत्री होरें आखेआ।

<><><><><><>

Reasi Specially Abled

दिव्यांगों गी सशक्त करने आहली इक पैहल दे तैहत रियासी दी डिप्टी कमिशनर निधि मलिक होरें अज्ज रियासी च दिव्यांगें आस्तै उपकरण बंडनै सरबंधी इक शिविर दा उद्घाटन कीता। इस कार्जक्रम दा सरिस्ता समाज कल्याण मैहकमे आसेआ आर्टिफिशल लिम्ब्स मैनुफेक्चरिंग कार्पोरेशन ऑफ इंडिया दे सहयोग कन्नै कीता गेआ। कुल 112 लाभार्थियें गी मददगार उपकरण थहोए, जिंदे च मोटर कन्नै चलने आहले ते दस्ती चलाने आहले ट्राइसाइकिल, सुनने च सखाल आहिलयां चीजां, बैसाखियां ते होर केई समेयान शामल हे। एहू कैंप इक व्यापक पुज्ज बनाने आहले कार्जक्रम दा हिस्सा ऐ। एहदे शा पैहले रियासी च इयै नेय पंज कैंप आयोजित कीते जाई चुके देन। कार्जक्रम दे दौरान मीडिया कन्नै गल्ल करदे होई डिप्टी कमिशनर निधि मलिक होरें आखेआ।

<><><><><><>

Kishtwar Food Processing

मकामी करसानें गी सशक्त बनाने ते खाने-पीने आहली चीजें सरबंधी भलेआं लौहके उद्यमें गी बढ़ावा देने दे जत्नं च किश्तवाड़ दे मुख बागवाणी अधिकारी दे दफ्तर नै छात्रू ब्लॉक दे चिंगम च पी.एम माइक्रो फूड प्रोसेसिंग उद्यम योजना दे हिस्से दे रूपै च इक रोजा कार्जशाला दा सरिस्ता कीता। एहदा मकसद करसानें, आप सहायता समूहें दे सदस्यें ते बेरोजगार नौजवानें गी योजना आसेआ दिती जाने आहली माली मदाद ते मौकें दे बारै च जानकारी देना हा। इस योजना च 500 कोला मते प्रतिभागियें हिस्सा लैता जेड़ा इस खेतर आस्तै करसानें दे बधदे उत्साह गी दर्शादा ऐ।

<><><><><><>